

2021 年高師大原住民族語朗讀【澤敖利泰雅語】 編號 1 號

pintasan nku Lyung Penux

- 1 t'aring sku zik rrgyax hmbku ku 'ruyux balay na llyung, lalu nya ga Lyung  
2 Penux. aring pyang 'wang ru tehuk sku bsilung ga mpuw payat ku alang tayan  
3 hnasun nya. trang rahu sya i 'bagan ga, mutux memaw mkalux ku sya nya, tehuk  
4 sku 'misan ka mtkyay lga, kinhhway ku sya nya lru, mutux halan msina na bbinkis  
5 maha pbya'i cikay ku sya walax. Lyung Penux hani ga siga kyan ku lyutux nya  
6 mlahang sku kwara niya mbku sku s'yap nya na alang ru kinyanux na aatayan.  
7 pyang gleng ga S'uraw ru Maylubung. sazing alang hani hiya ga cinlangan nku  
8 Byorit Tay'ang. ki 'syap na Maylubung ga Nguhuruma, mwah te hugan nya lga,  
9 Mbwanan ru Maypuwan. tugan alang hani hiya lga, bung na cinlangan Byorit  
10 Tay'ang uziy. mtana cinlangan nku Byorit Tay'ang ga niya mbku sku Sire, Talawan,  
11 Lipa ru Suruw. mspat alang hani ga pyux ku blay tunux na tayan, siga pyang gleng  
12 magan spngan gaga ga Kagi, kahun Mbwanan, tugan mrhuw na gako kocyo ga  
13 minkahun kya uziy. gocyo ru gi'ing ga kahun S'uraw ru Maylubung.  
14 ki 'syap na Talawan ga alang bung na Taycung Hoping la. Tgbin, L'olu, Kagaw  
15 ru Kling ga klhangana na Takang, mbya M'ihu ru S'yux lga bung na khangana Cyu la.  
16 nanu alang M'ihu hani ku inkhulan nku Walis Nokan, pyux balay binrwan nya knxan  
17 na tayan. alang naha kyan uziy ku kocyo ru thoki kinsat. pyang min'aring muhi sku  
18 lukux ga Motenring, ki mki sku alang na L'olu. ngayat ru ba balay mlahang sku  
19 lukux ku laha, pyanga sa mraya hazi kinyanux naha, kyan uziy ku inlungan naha  
20 klhangay ta kwara alang, pyanga sa tmasu rahu gunu 921 lga, psr'xun naha ku  
21 inlhuyan na Tmabun, sobih mpusan kayan ku rnaw naha kwara alang syaw na Lyung  
22 Penux.  
23